

修訂日期: 2009/04/22 發行日期: 2009/5/9  
發行單位: 中華電子佛典協會 (CBETA) <http://www.cbeta.org>  
資料底本: 卍新纂續藏經 Vol. 69, No. 1348  
原始資料: CBETA 人工輸入, CBETA 掃瞄辨識

## No. 1348

### 雪庵從瑾禪師頌古集

#### 女子出定

誰在畫樓西。相逢語咲低。到家春色晚。花落鷓鴣啼。

#### 舍利弗入城。遙見月上女出城

大地絕纖塵。面南看北斗。嫁雞逐雞飛。嫁狗逐狗走。

#### 楞嚴經。佛謂阿難。見見之時。見非是見。見猶離見。見不能及

隔牆見角便騎牛。騎入紅塵鬧市遊。遊徧歸來欄裏臥。三更半夜失踪由。

#### 迦葉門前剎竿

家家門口透長安。不見纖毫眼界寬。無法無人誰付囑。難兄難弟自相謾。

#### 師子尊者赴闍寶

蘊空誰見法中王。覲體何曾礙劍光。古廟藤蘿穿戶牖。斷碑風雨碎文章。

#### 達磨見梁武帝

踏翻地軸地不動。推倒天關天更高。穩泛鐵船歸少室。至今天下起風濤。

#### 達磨隻履西歸

九年冷坐已敗闕。隻履西歸更脫空。後代兒孫空妄想。鷓鴣啼不為春風。

#### 二祖安心

自有覓不得。無端面發紅。翻身喫一[蹟\*頁]。兩手摸虛空。

#### 六祖。因僧問。黃梅衣鉢。是何人得。祖云。會佛法者得。僧曰。和尚

#### 還得不。祖曰不得。僧曰。因甚不得。祖曰。我不會佛法

不會黃梅佛法。夢中合眼惺惺。此地無金二兩。俗人酤酒三升。

#### 忠國師三喚侍者

一箭射雙鷗。雙鷗隨手落。波搖岳陽城。月滿滕王閣。

#### 馬祖云。自從胡亂後三十年。不曾缺鹽醬喫

當年高甲已登科。讀盡人間萬卷書。今日一身天地窄。思量好事不如無。

#### 百丈曰。老僧昔日被馬大師一喝。直得三日

#### 耳聾眼黑

一喝當頭雷電奔。人間說亦暗銷魂。看來豈止聾三日。直至如今海嶽昏。

**南泉曰。馬祖說即心即佛。王老師不恁麼道。不是心不是佛不是物。恁麼道。還有過麼**

刎頭頭光生。洗脚脚清爽。脫衣上牀眠。抓著通身痒。

**夾山曰。我當初在大梅。失却一隻眼**

竹籬茆舍酒旗斜。一个胡芦敗兩家。酒後不知天與地。皈來滿地是桃花。

**槃山將順世。告眾曰。有人邈得我真否。將所寫真呈。皆不契師意。普化出曰。某甲邈得。師曰。何不呈似老僧。化乃打筋斗而出。師曰。這漢向後掣風狂去在**

徹底冰壺無影像。倒翻筋斗摸難成。千峯雨歇黃梅後。桂魄還從海上生。

**魯祖面壁**

無目仙人揣骨頭。暗中摸索認王侯。價高畢竟無人買。冷却构欄慳[怡-台+羅]休

**藥山造石頭之室**

恁麼不得總不得。脫却布衫赤骨律。劈頭一搭忽翻身。便見口開并眼白。

**時人見此一株花如夢相似**

同根一體都如夢。夢裏惺惺眼又花。蝴蝶飛來過牆去。不知春色落誰家。

**甘贄設粥**

甘贄設粥。南泉打鍋。一般病痛。徹底諍訛。更有些兒好笑。明朝餓殺禪和。

**南泉平常心是道**

悟得平常達本鄉。時人多怕落平常。青春只有九十日。爛醉都無一百場。

**趙州曰老僧使得十二時**

鍾送黃昏雞報曉。趙州何用間煩惱。裂破虛空作兩邊。古廟香爐出芝草。

**趙州行脚到臨濟**

臨濟趙州。禪林宗匠。特地相逢。恰似相撲。撞見今時行脚僧。呼為兩箇閒和尚

**秘魔木叉**

威風凜凜不容攀。跳入懷中便解顏。不是酒腸寬似海。爭知詩膽大如山。

**祇林降魔**

無魔無我已降魔。添得時人眼裏花。今日鏝錫無用處。也知賊不打貧家。

**臨濟陞堂。有僧出。師便喝。僧亦喝。便禮拜。師便打**

棒頭有眼。眼裏無筋。多逢濁富。罕遇清貧。自入洞門烟鎖斷。不知世上幾經春。

**趙州問大同禪師。大死底人却活時如何。師曰。不許夜行。投明須到棚前夜半弄傀儡。行動威儀去就全。子細思量無道理。裏頭畢竟有人牽。**

**興化與旻德問答**

一喝兩喝。全機出沒。賓主歷然。未免俱瞎。半夜摸烏龜。明月照積雪。

**興化見同參來。纔上法堂便喝。僧亦喝**

須彌倒卓。海水逆流。同參相訪。作盡冤讎。休休。明日黃花蝶也愁。

**巖頭。因僧問古帆不掛時如何。師曰。後園驢喫草**

古帆未掛時。後園驢喫草。日短苦夜長。行人須及早。

**乾峯一路涅槃門**

當面非暗投。應機皆直說。乾峯與雲門。兩口同一舌。若是續貂人。弄巧便成拙。

**雲門上堂。聞聲悟道。見色明心。遂舉起手曰。觀世音菩薩。將錢買餠餅。放下手曰。元來祇是饅頭**

頓超見色聞聲句。不涉明心悟道言。花落鳥啼巖下寺。月明人喚渡船。

**禾山解打鼓**

當陽打動番南鼓。萬象森羅立地聞。不是大家齊則劇。難消白日到黃昏。

**法華。因僧問生死事大請師相救。師曰。洞庭湖裏失却船**

洞庭湖裏失却船。赤脚波斯水底眠。盡大地人呼不起。春風吹入杏花村。

**黃龍三關**

我手何似佛手。合掌面南看北斗。兔推明月上千峯。引得寒山開笑口。

我脚何似驢脚。急走歸家日將落。自古長安如鏡平。無端醉倒黃番綽。

人人有箇生緣。且非東土與西天。擊珊瑚樹枝枝好。撒水銀珠顆顆圓。

佛手驢脚生緣。南海波斯泛鐵船。精金美玉團堆賣。畢竟何曾直一錢。

**五祖演曰。倩女離魂。那个是真底**

南枝向暖北枝寒。何事春風作兩般。憑仗高樓莫吹笛。大家留取倚闌看。